

四庫全書

集部

欽定四庫全書

集部

龜巢稿卷十五

詳校官監察御史臣劉湄

中書臣劉源溥覆勘

總校官知縣臣楊懋珩

校對官主事臣陳文樞

謄錄監生臣張元愷

欽定四庫全書

龜巢稿卷十五

元 謝應芳 撰

祭章 哀詞

祭姚吉甫文

嗚呼物之不齊誰其主之齒去角存從古如茲如公之
生壽富且寧不泯其脗百福具并奈何狂飈蘭摧桂折
乃館二甥以繼其絕苟非達觀佛爵奚堪公能釋然優
游燕酣凡我親朋時相往來有客心醉春風滿懷數日

之間數往問疾留連眷顧其情愈密卜云其子醫獲微
功方疑著龜遽爾而終於乎蒼天知乎不知伯道無兒
千古之悲所可慰者女能奉母歲時烝嘗亦猶有後凡
我親戚忍言長違奠此杯罍涕泗沾衣

代王文甫祭兄文

嗟嗟我兄少歷崎嶇相我先子經營厥家自失所怙顛
危誰扶繫我與兄左枝右梧我室苟完兄力其痛嗚呼
哀哉兄於斯世閱七十年天賦其醇樸而不鏹故此家

事吾其勉旃尺布斗粟曾無間言所可喜者兄其息肩
幸有二雛能奉周旋日飲無何皞皞其天意此安佚壽
或可延奈何既衰屢疾屢痊絕粒信宿晞露溘然嗚呼
哀哉誰無兄弟我獨孤苦顧二雛者視予猶父我嘗勗
之以繼先緒矢心以辭酸淚如雨

代祭子文

嗚呼天降禍於我家何其酷耶我生勞勞髮已垂白冀
汝冢子仰事俯育以繼先緒汝年既長頗涉世故與汝

諸弟左枝右梧我經爾緯我作爾述知稼穡之艱難未
嘗敢慢而敢逸也惟汝多病常貽我憂去歲仲冬幾致弗
救厥疾既瘳我心則喜然未嘗假以詞色實慮汝因疾
之餘弛而弗張馴致怠荒故也正月我適錢塘別方兩
旬訃音忽至將信將疑屢泣屢止意暴疾氣或絕而復
蘇聲或喑而再語旬匱來歸汝簣已易汝棺已歛吾無
復見汝之面矣可不痛哉可不痛哉嗚呼彼蒼者天我
罪何居人或釋之子淵之天顏路何辜信乎脩短之有

數耶天道之茫茫耶不然何乃使汝不得其壽也嗚呼
汝子汝女嫡庶五人女嫁其一子皆未婚汝何忍置之
不顧耶食指之衆賦役之重又何忍老父無息肩之日
耶死而有知汝必念我於冥冥之中而我之所以念汝
者將何時而已耶嗚呼痛哉我築之室汝弗與居汝蓄
之器用以祭汝今卜日祔葬汝祖塋之側撰此飲食與
之永訣汝妻汝孥哀慟欲絕

代王氏祭叔父文

嗚呼痛哉我叔父春秋七十有二年始于承家中于克家
終于成家其劬瘁艱苦非諸幼所能盡知也但見完美
之室風雨不動衡從其晦阡陌相連男有室而女有家
水乘舟而陸乘馬非叔父累積之功何以得此哉至如
目能識丁皆叔父延師之力也行不犯義皆叔父提耳
之訓也一家之間總服同爨以叔父之恩無偏情無私
嗚嗚之威嚴不可犯故能齊其不齊以致其齊耳嗚呼
痛哉庭訓之言萬萬千千今不能盡述矣如南塾篝燈

東軒奉茗嘗屢進某等于前而語之曰吾兄弟自生至死未嘗有閹牆之日也吾夫婦自少至老無牝晨之患也隣不爭畔帑無私蓄許人以諾不食其言鈎距不知掊克不能汝等亦能如是乎凡此數事反復告戒知幾朝夕今其已矣斯言不可得而聞矣而某等為之子為之姪為之孫者可不追念貽謀而踐其成法乎否則為叔父之辱親朋之譏鄉里之笑天地間之罪人也嗚呼痛哉去年之先人皆謂叔父矍鑠其壽未艾也孰謂數

月之頃眎則眊焉聽則聵焉筋力索焉方病而紅冠入室病愈而租吏打門百憂感心二豎成禍而某等猶以醫藥可恃而不懼也詎意遽至是耶嗚呼痛哉教育之恩固不能報其萬一但速葬以遵治命如此永別之悲五內如割泣血一酌維以告哀嗚呼痛哉尚饗

代周華甫祭伯文

昔我先人之早棄諸孤所恃兩伯其一復殂歸然獨存山澤之癯憐我兄弟教之友于雖異厥居有無相須撫

之愛之與子不殊奉承周旋非朝伊晡階庭之間言笑
怡愉小過弗責曲禮弗拘叱咤之聲罔及僕夫鄉稱善
人久矣不誣年踰八秩健飯為娛詎意一疾竟若摧枯
由茲而往誨言則無疑難誰質顛危誰扶寧不使我哀
號痛呼伯兮伯兮死不復蘇薄陳簋簋清酒一壺收淚
永訣靈其鑒諸

代祭吳閭閭真人文

玄元之學世遠年湮不有先學孰貽後人伊昔上卿道

契世皇手持玄珠光明四方我師繼之山鳴谷應弘道
累朝惟清惟靜帝錫之爵羽節霓旌邈乎高風崆峒廣
成出入西垣在帝左右黼黻皇猷厥功亦懋名日益重
德日益尊世則賴之以棟玄門豈不懷歸怡雲舊隴勇
退弗獲祇承天寵閭閻之情聖皇所知大書觀闕雨露
所施奎畫煥然寶翫無斁瓊館逍遙以永朝夕胡厭斯
世遽遊薨羅哀聞九重傷如之何我諸葛翁嗣法之孫
如牛馬走忝為後昆舐鼎而仙

原闕
二行

為亮西山祭光祖庭文

生必有死斯理焯焯況我釋氏以滅為樂獨於交情實
不能無若我與君忘之可乎昔在光孝親如葭莩承平
異處患難相扶故山丘墟避地東吳未幾言旋如絃如
夔銅馬西來猛於猘獠再涉大江九人與俱披荆間道
體無完膚既脫虎口猶虞畏途吾二人者始終持扶白

郊宵征狐嘒鬼呼沙磧遇舊廼衣廼鋪萍聚雲散連年
海隅每一握手猶論毒痛維莫之秋以予起甓爰繼我
師踞天惠室與居相依鐘鼓朝夕平居論道風飛電激
方期進脩各殫其力君遂云亡必樂於寂我失良友是
用悽惻溪毛之薦謹維來格

祭沈仁齋文

天道何茫茫耶顏氏之仁不永其年抑跖之暴壽胡以
延豈有生之初氣稟其偏乎抑蜉蝣朝暮蟪蛄春秋一

皆聽其自然乎如君之生洵美且都鄉里共稱吉人之
徒蚤歲失怙藐焉而孤仰事俯育綽乎有餘若騏驥之
夙駕且能範乎馳驅每遊四方以曠其居

原闕

如遺如其有知忍此別離我婦我子其慟亦宜天命
奈何彭殤不齊傷哉永訣漬縣以詞

為葛子寧祭父文

嗚呼天乎人孰無父獨不假我父之年遽止是耶在昔
家居仰事俯育以大父遺業之重隻力負荷嘗慙弗克

所樂者惟琴惟書惟吟詠而已餘無所嗜好也嗃嗃之聲弗及大馬姻族閭里咸薰其良善人之稱無間然者數年以來遭時艱棘流離異鄉食指百餘賴父全活亦豈易為然耶嗚呼痛哉時之避難者妻孥啼號或委溝壑吾父則旁求治生之術使某與母等無凍餒之憂也時之人居無室廬或冒風雨吾父則納交仗義之士使某與母等得居處之安也至若族有孤寒之胤家有臧獲之衆亦莫不愛之如骨肉然縉紳之士多與莫逆葭莩

之親相與依倚但不肖孤不能幹蠱負義方之訓為多
然我父之慈訓未嘗不勤也今也一疾遽爾大故顧某
等為孤為嫠者真若喪家之狗失水之魚矣嗚呼蒼天
其無知乎如其有知視孤嫠之悲若此而不為之憐遺
乎然而悲則悲矣猶有可慰乎冥冥中者吾母以栢舟
自誓將星冠羽服以終其身以父之靈陰相之某雖不
肖既於父有風木之感幸母之存寧不服勤奉養以慰
吾父乎矢心陳辭維以告哀惟吾父念之

代祭表嫂文

維靈之生錢橋望族嬪我表兄閨門睦睦賴有內助以
生以育暨肥其家且養以福吾兄強仕朔南宦遊嫂居
於家家政克脩男鰥而嬉女幼而柔以母可怙父弗為
憂頃因喪亂家燬於兵吳往越還千懼百驚寓茲吳門
待時之清念我胤子可教而成以女許嫁親親相仍擬
古朱陳卜世莫京雖居異鄉客舍連楹嫂嘗有言兒女
鍾情必娶必嫁此心乃寧適予親喪連服經緯子未可

醮禮文亦虧惟嫂之言艱難共知戮力同心教子擇師
眷我婦子朝斯夕斯一味之珍食必共之方期將來嫁
娶有時安知一疾遽爾而姜聞者愕然慘怛歔歔况我
骨肉胡寧不悲最可悲者兒號女啼而今而後號號何依
嗚呼死而無知哭之嗚咽尚饗

代祭弟婦文

嗟我兄弟遭時艱危兵燼其廬星散其人使汝妯娌等
不能同家而處共爨而食于今凡六年矣然吾弟賴汝

之力以巾以櫛以絲以象以鞠其子女常得以慰吾心
焉向也吾弟與爾避地浙左吾夫婦每念汝婉孌之姿
跋涉山川漂搖風雨多有可憂者焉幸而言還得同居
長洲茂苑間者數月吾乃就食於無錫矣又使汝妯娌
乍聚而散百里之間相望相憶而不能數相見也近方
喜汝子暫贅而歸其妻將有拜姑之日矣又喜女擇配
得人亦將館甥之時矣滿謂時將小康仍居故鄉少長
咸萃構一晦之宮犁二頃之田歲時灑飯於先人之墓

側則吾妻與汝復得相率以事蘋蘩矣數日之前方聞
安信片紙之上忽來訃音使舉家相顧失色始而疑焉
終而信焉莫不為擗踊而長號也嗚呼痛哉天胡不仁
奪吾弟之內助者耶地胡不仁奪吾姪之所恃者耶苟曰
非天也非地也以汝之徽柔淑慎乃何為天閔如此哉
自今以往雖不知故鄉之願能遂否其或遂焉亦不得
與汝一日之同也死生之間此憾何極雖然天降喪禍
雞犬弗及寓哀茲觴無任於邑

代祭趙師呂文

公之生也七十有六年時有盛衰事有得失境有逆順
物有欣戚公其處之操履如一其少也以簪纓之裔而
無爵祿之念其壯也以陶猗之富而無奢靡之習及其
年之老成尤儉素而篤實為鄉里之善人不鬪智而用
力橫逆之來唾而弗拭蓋明夫舌存齒亡之理而得乎
全身遠害之術每論平生禍福靡常驚膠之絃三斷而
三續鳳穴之雛或存而或亡銀粧羽化付之渺茫知有

命之在天忘鳬鶴之短長維箕維裘授子及孫閒居別
第翟公之門清風茗椀沉水鑪薰日怡情於書畫絕無
心於世紛視不義之富貴如太空之浮雲獨念先世欲勵
後昆託祠事於老佛之廬屬喪具於葭葦之親視死如
歸餘何足云或謂公之可憾者燕子樓化為劫灰科斗
壁飄為風塵殊不知公之達觀藐如墮甌未嘗怨天而
尤人也今也人遭亂離多殞鋒鏑橫屍四野烏鳶之食
公乃得全體之歸佳城之室回視前日之死於非命者

安能企其萬一乎某等親親尊尊道義交結涉江以道
其喪雪涕以臨其穴一觴敬酌千古之別公如不知我
語又安知信宿之先方歸覲省一別之後遽疾而徂嗚
呼哀哉倚門之母其望懸懸垂髫兩兒其泣漣漣鵲原
永歎鸞鏡莫圓德哉若人何辜於天如某等葭莩之親
情猶骨肉既不及匍匐而往救徒號呼而頓足旅櫬未
歸橫山埋玉顧彭殤之不齊信斯理之難燭漬縣以詞
酸淚盈掬

代張希良祭王文甫文

公之一生磊磊落落操心至公俛仰無忤出辭必信不
事鐫鑿人或狙詐言諄聽藐家庭之間一呼百諾奔走
服勤罔敢乖錯及交親朋春風笑謔恩誼有餘禮文則
畧患難相救扶顛濟弱鄉閭庇庥恩猶不薄或饑而餽
或病而藥或輔其仁或糾其惡周恤貧窶不輕唯諾頻
年時危所在跼蹐鄉人愛之歛衽如昨施德有報理亦
昭灼我曹多幸松蘿附託凡詣甥館必席賓幕從容語

言欵洽杯酌別不忍去期必如約今公已矣失我桀黠
枉者誰矯憎者誰覺寐者誰範厥者誰削誰指其迷誰
斷其望靜言思之相視錯愕掩袂拭涕薦此澗酌

為周縣尹祭顧元公文

盛德之士使人後千載而興起者其信然乎猗我元公
才兼文武其文也世稱三俊為當代之儒宗其武也羽
扇一麾走六州之豺虎醉非嗜酒免禍驕主醒非沽名
赤心自許抗疏補衮職之闕擇賢進邦國之輔史不一

書勲業昭著世徒知思尊而歸者之為高而不知採蘋
南山之言先入乎其肺腑故公之歿特為公鼓琴而悲
慟哭而去也睠茲長洲實公鄉土桑梓之宮墓有祠宇
何物地靈混此室處斥而去之陳我簋簠悵煙塵之滿
眼懷清風之白羽維公有神以福黎庶

為周尹立碑祭元公文

昔典午氏碑表有禁勒石公墳勲業昭甚事傳信史石
亡何時走尹茲邑永言懷思載葺祠宇籩豆具陳祀神

有詩刻諸堅珉峴首之碑令人墮淚吳人於公亦復何異惟公有靈陰隲吳人克文克武無愧先民

代姜周佐祭姊夫王仲德文

君之老姑為我叔母而我女兄獲奉箕帚我弟於嬖復得其偶如古朱陳婚姻世守先人嘗言君性醇厚人或顛危君力能救吾親雖亡斯語不朽如予不肖公亦弗陋有過必規有善則誘眷我兄弟無一或否公年半百間居靜守閨門之內肅若賓友忘情軒冕意適杯酒獨

奈今年避寇奔走挈家于吳虎兕傍吼千驚百憂窘束
如杻一女鍾愛疾莫能救羣盜稍息歸卧南牖襁褓之
珠復碎于手公之痛心如割如剖痛猶未定厥疾斯邁
嗟哉吉人天胡不祐今公之歿命也誰咎凡我私親倚
仗何有尤憐女兄孤燈白首撫膺長號淚濕雙袖

為王孟學祭母文

蚤歲失怙惟母焉依母其視之猶掌中珠未寒而衣未
飢而殮左提右挈顧之復之夙夜檢束惟恐不能自立

以保其身以承其家以奉大父母及諸父之訓諄諄之言不一而足每於舅姑之側視其色有不豫然者退則惴惴檢其不及既自檢束又詢之二雛曰而於大父母之志或有違乎事或有怠乎抑而不能謹飭以貽其憂乎母之欣戚繫乎兒之有過無過未嘗一日忘乎懷也仰事俯育罄居而憂勤者十年男室女嫁志願方畢然於祭祀賓客之奉身先中饋亦未嘗一日之或懈也嗚呼痛哉以母之康強而年未艾烏鳥之情方圖萬一庸

詎知一疾而不起耶臨絕之言謂死無憾特以弗克終
養舅姑為懽是則吾母之孝於舅姑者為何如哉宜乎
舅姑之痛不翅如父母嗚呼風木之悲兒將奈何惟當
追念母訓兄兄弟弟各勉成立律身成家竭力以奉承
諸父以養大父母之志尺布斗粟昆弟共之不敢有毫
髮欺隱意其所否者是忘其親忘其親則不孝之罪上
通於天雖吾母之慈有不可得而宥者惟母有神尚其
相之庶踐其言以慰母矣

為陳彥直祭外姑文

嗟我外姑德不可滅孤燈十年栢舟高節為婦而孝為
姑而慈林下之風鄉稱姆儀如諤與謙材俱碌碌壻于
名門蒹葭倚玉每詣甥館升堂起居必詢女家諸兄何
如或墮優逸勉之克勤防微杜漸忠言屢聞或坐孱弱
戒之自立扶顛持危惟恐不及比嬰微疴臥在牀席我
來候問仍飯而食眷顧之情無異於常及女來歸語猶
琅琅一日之間遽成永別卑尊戚疎故皆痛切曰婿與

女感恩如前豈不哀思泣涕漣漣幸有賢嗣篤親如母
夔蛇相憐義當永久死而有知知予之悲一觴敬酌靈
之格思

代胡伯亨祭外舅張守齋文

於乎惟我婦翁鄉之善士不鄙庸愚妻以其子既妻其
子恩義兼至念我先君夙昔交契今也孤斃遭家殄瘁
勗女內助庶弗顛躓每詣甥館言提其耳翁經州閭必
過敝止綜理厥家以綱以紀親之愛之眎子無二別無

幾何聞疾以瘡女舟歸寧夜渡淞水訃音條來驚使躡
地匍匐及門翁已長逝我服雖總我哭不依矧為女者
其痛曷已潔此一觴進饌靈几永言哀思翁其鑒只

代金子俊祭錢仲居文

嗟嗟仲居其止於斯福善禍淫天胡我欺父為善人君
亦如之匪義弗取匪善弗為曰儉曰勤俛焉孜孜業日
益廣家日益肥十數年間遭時艱危賦歛之蛇毒人骨
肌君安其親茹荼如飴弟則友愛室家其宜是皆深淳

親親之推眷我姻戚肝膽相知溫溫其容抑抑其儀莫
可忘者顛危扶持僉曰若翁澤流未涯厚培其根必茂
其枝詎意一疾遽爾而萎禍福之柄誰其倒持於乎蒼
天天闕若茲某等念乃疇昔胡寧不悲矧有雙親遺孤
與嫠其痛之鉅庸曷已時我眷不相我淚霑衣言採溪
毛薦此一卮嗟嗟仲居庶或格之

代張伯仁等祭父文

嗚呼痛哉樹欲靜而風不停子欲養而親不待哀哀諸

孤所以痛裂乎其內也仰惟父天覆我兒女男室女嫁
志願俱畢且復為之樹產業立根本使各得衍其餘澤
焉第所恨者吾父之生過於勤勞六十九年日用矻矻
未嘗得一餉之優游也矧逢艱時子或受圍於城者親
雖野處心常危之或行役於遠者親雖家居心實隨之
餘在侍旁雖者可樂然憂患則為之料理征徭則為之區
策亦未嘗忘於懷也至如鶴長鳬短物不能齊又豈能
不拂吾親之意哉今也兒無所依女亦何怙菽水之歡

不復可得是雖五內之裂亦徒然耳某與弟等但黽勉
襄事以吾親素嗜佛學視身為幻敬以茶毘之法奉之
遵治命也輜車在門翌日永訣非焉一奠吐此哀衷

祭先墓文

於乎陵谷之變知繫乎時惟情所鍾不能不悲昔我先
壠松大十圍今皆宿莽荒煙盡迷穹碑已仆佳城或隳
或幸而存冢眠狐狸曰不肖孤避兵海涯九死一生如
鳥無枝十有六年豈不懷歸回首鄉關道阻且危丹陽

之東吳門之西方數百里野無黔黎我兄我姨家亦靡
遺我父與母夢或見之既寤而歎涕泗交頤今我冢子
攜厥妻兒歸畊舊田丘壠是依餘口猶十未能同歸歸
何不能生理未治旅食異鄉破研日隨尚賴遺澤歸或
有期載耕載穫蒸嘗于茲或樹松楸如前盛時嗟我祖
禰知乎不知拜伏墓下拭淚陳詞

代張伯仁祭黃景先文

近年耆英晨星霜木婁人視公崑山片玉公之為人生

有罷局遭時迭遭如玉韞積措紳之文罔不刮目公之
處家仰事俯育陸賈之橐兒女均蓄彼經此緯同一機
軸公之居鄉春風穆穆凡與之遊惟善是最正烈高風
遐邇咸服於我姻靈眷義尤篤念無後人墜緒誰續以
孫贅居我女蒙福哀我親喪觸暑匍匐弔之唁之沃盥
之辱比予走謝留連款曲別方兩旬書往而復豈意公
亡疾不經宿予聞訃音哀淚盈掬奈役於官如新濕束
送不執紼罪奚可贖公或我知於我碌碌束芻之奠鑒

此心曲

祭大雲講主文

師之高年七十有九以涅槃而論之復傷之何有人之
所以哀吾師者吾知之矣一大藏教淹貫胸中如魯靈
光天台之宗今也砥柱摧折墮波洶洶同袍之士其誰
適從三周七喻化導羣迷隨所住處桃李成蹊今也野
狐長嗥彌天疾藜信從之衆疇將依歸吾黨固嘗月旦
之評曰善與人交僧中之晏嬰也度不可量方外之黃

生也其愛客則孔融而衣緇其滑稽則方朔而釋名也
觀其詩則見其心之平淡而無牛鬼蛇神之怪觀其畫
則知其興之清逸而出乎山礬水仙之外若此者豈非
大雄氏所謂無罣礙者乎抑亦所謂得遊戲三昧者乎
是則吾黨平昔之所敬愛而今日之以為誄也彼千駟
萬鍾而死欲使吾黨贊一詞而不可得而况為之沃盥
乎言採絲蒨淞江之曲懷哉若人薦此寒淥

祭柴處士文

近年耆英晨星落落刻剝為方誰其矩矱惟公渾厚不
凋不鏹如玉在璞如珠在淵寄跡隴畹絕意圭組為龐
德公不入城府以善為樂襟抱生春為馬少游鄉稱善
人高堂眉案如賓如友梁鴻孟光無此白首幹蠱有子
三鳳翩翩源深流衍理固宜然昔我先君深敬於公所
以敬者古人之風先君云亡公來慟哭吊死問生重禮
之辱由茲而來陵谷變遷干戈所至流血成川公之居
安其福孔厚年過七十宜為希有予聞訃音義合匍匐

吏呼石壕去不可得言采溪蘋薦此一觴公其鑒之我
洒霑裳

子祭父文

代柴貴賢作

父生三子女亦如之長養婚嫁恩義惟均以恭出贅愛
念尤篤定省雖踈音問不絕每歸侍旁奉親飲食分甘
食之親同稚孺豈惟食之誨言諄諄惟懼孱弱弗克樹
立撫恤諸孫欣欣色康兒所喜者親在健飯兵戈擾攘
十五六年幸無禍波以及吾親微疴月餘靡神弗宗供

役於官如墮膠漆間嘗請告歸侍湯藥父曰亟去公家
事急兒能了官父心乃安別方數日聞病小愈豈其奄
忽永訣終天風木之悲尚何忍言嗚呼哀哉吾親之死
人皆哀之姻戚之哀思親義也鄉隣朋舊哀善人也我
兄我姊我妻我孥其痛如荼五內崩裂罔極之恩奈弗
克報所不敢忘各慎其身黽勉成立無忝所生尚賴遺
澤垂裕後人

祭蕭處士文

蘭陵望族竹帛著稱高年過於伏生儉德同於晏嬰自
罹喪亂多遘迍遭萬死一生脫性命於虎口三吳百粵
寄身跡於狼煙覩姑蘇之麋鹿重遊念北山之猿鶴相
望言歸故里欲正首丘顧親故鮮有子遺喜父子獨能
無恙安居未幾怪事忽生叫閭救無辜之孫霜飛六月
奉命復愁遺之老風動四方蓋埋劍之氣衝於斗牛故
覆盆之光照於日月遂爾貽謀之願灼然陰陽之符骨
肉聚於目前脩髓供於膝下得正斃而全四體應含笑

而赴九泉蹇余劣才荷公知己自青年而蒙館穀至白
首無異金蘭又如王趙之交亦有陳雷之義今皆已矣
可不痛哉老淚淋浪持束芻以效孺子儀容彷彿撫絲
桐而呼彥先即此微忱伏惟尚饗

祭錢鼎卿文

代親友作

吳越世家焜煌史冊公為雲初蔓延遺澤昔在妙年青
雲氣格弗屑於時丘園自適風流文采聲亦藉藉晚罹
兵燹稍涉難厄三江五湖浮家泛宅歸帆無恙佳兒連

壁廼疆廼理難乃榛棘菟裘鶴渚谿流環碧公其優游
素願斯獲邀月呼酒看花岸幘賓朋往來冠蓋絡繹滄
瀨之供子盡厥職自春徂冬頗須藥石厥足蹢躅心仍
夷憚所憚者子服勤無數其宜泰然瞑目中夕顧惟某
等攸居咫尺匪親伊故心皆莫逆今也云亡如失肘腋
緬懷德容傷心如刺鄉飲之歡無復共席薄言采藻薦
此寔寔惟公鑒之有如平昔

又

代兩甥及
甥女壻作

昔人有言見舅如母此蓋由親親而推之乃常情之所
有如我舅翁其親愛於甥及甥女之夫者尤恩深而義
厚厥恩伊何涵濡撫摩視孱弱而為扶植者支一木於傾
厦屹砥柱於頽波厥義伊何切磋刮磨念昏而為牖之
者鑿渾沌之七竅投阿膠於濁河然則翁之為舅氏而
愛其甥者眎餘人為何如嗚呼痛哉軟脚之疾醫云無
傷謂翁健飯全愈可望如某等朝夕承奉於理固當奈
公私之服役磨旋蟻之奔忙故不服勞於左右操儿而

執牀又安知一夕甘寢遂亡耶嗚呼痛哉聞訃而疑蒲伏
救之救不可得徒哭而悲平生之恩義欲報而無期一酹
永訣涕泗霑衣

武進縣學起講堂祝文

維洪武五年四月二十日常州府武進縣承務郎知縣
董某從仕郎縣丞陳某將仕郎主簿尹某謹以釋菜之
奠敢昭告於大成至聖文宣王曰夫學以明倫尚矣凡
為學宮必先乎講習之地使學者登降揖讓咸有儀度

朝斯夕斯以明人倫之道斯堂之所亟其成也而某等
勉共厥職以副朝家興學之意尚惟聖神於斯文有以
相之

縣學諸生祭陶兄文

天道何茫茫耶跖暴而壽顏仁而夭蘭摧桂折樗櫟合
抱是皆必有其說蹇余昧而莫之曉耳吾友陶兄如玉
在璞鍾厥愛於雙親求良工而彫琢既賣金以買書復
徙居而近學惟吾兄心父母之心故能孜孜厥修類之

如麟之角也吾黨碌碌辱交連年竊鄰燭之餘光亦效瞶
而勉旃方期吾兄馳騁詩書之林游泳道義之淵又安
知車方駕而覆轍弓始張而斷絃也耶嗟哉彼蒼誰薄
誰厚賦命不齊吾將誰咎惟沒世而有稱斯可謂不朽
彼區區與草木同腐者雖龜鶴之年而亦何足取哉嗟
我友兄其止於斯其心孔哀其友亦悲一慟永訣漬繇
以詞

武進縣學移先聖祝文

廟貌之設人所具瞻所以尊聖賢寓祇敬也棟宇朽腐懼將壓焉不敬不尊責何可逃今將一殿兩廡撤而新之汎掃黷堂昇置神像聖靈洋洋無適不存具瞻之敬蓋自若也功僉事集神其相之

祭胡秀才文

公之父兄為吾友朋公之子孫吾與師生公嘗以父執遇我謙謙乎奉承翼翼乎將迎席必置醴途不並行我步我趨視為規繩然吾亦愛之重之與之語言未嘗不

肝膽相傾也於乎人孰無死有未死之前為子孫者或不能如親之志親沒之後或墜其基業是皆不能無憾於幽明也惟公不然孝友之行父兄素稱曰子曰孫起廢兩興別第新築良田歲登可以供粢盛奉輸征恤孤乳鄉里稱少游之善犁鋤帶常林之經死而有知豈不含笑於九原乎於乎昔我與公俱避甲兵公亡我存無復合并每想見之于墻于羹今也以一勺之行潦表四世之交情睇彼東吳遊魂杳冥吾將假巫陽之詞以招

之曰太湖之陰風濤震驚魂兮來歸歸我毘陵父兄之
丘壟相望子孫之箕裘通成念此土桐鄉之愛念老夫
芻束之誠魂兮來歸天風泠泠

祭胡子明文

於乎逸翁生長越杭以醫宦遊臺閭蜚英晚罹世變戈
戟搶攘挈家海壖晦迹韜光予未識公結交令郎觚斤
妖妄氣節激昂既見叔夜穆如春陽時方艱虞紛然虎
狼誨言諄諄戒慎周防吾其服膺如龜穴藏歲時往來

雞黍范張公年已高神氣益昌髮黥顏童飲可百觴興
致酣適庭視八荒詞多滑稽歌或慨慷以公達觀物累
俱忘蓋亦有子動合義方福善自天家有餘慶屢涉畏
途竟為康莊予嘗比之珠玉琳琅父執遇我我思敢當
所貴相知心腹腎腸公於吾兒翦拂揄揚將玉其成取
寸之長通家之好幾二十霜洪武己酉我歸於常贈言
孔嘉且貽篚筐心親迹踈煙水相望前年暮秋過公豁
堂三宿不寐情話連牀延致畫史為貌不颺復命其子

拏舟送將別來兩秋懷思弗忘初冬病餘孤卧若僵寄
書言懷并書數行歲聿云暮嗣音渺茫雪洲之報乃謂
公亡淞陰石川悲風白楊命林往奠老淚其滂

祭黃朱二友文

於乎兩駒並駕兮同一蹶兩輪並進兮成覆轍秋氣肅
以成物兮羗蘭摧而桂折鳬鶴斷而可悲兮何短長之
足說嗚呼天乎

祭徑山長老顏悅堂和尚文

福慧俱足惟佛稱首能具而微世亦希有如我悅翁是
希有者德尊一代聲溢叢社蚤被殊渥著金伽黎所在
說法四衆依歸晚坐南屏雷鳴鐘鼓雨華西湖魚龍起
舞丞相授經化伏羣魔凌霄絕頂砥柱頽波慧以知幾
福以歸休崑岡之陽為師菟裘師方退藏陵谷變改兀
如嬾融得大自在我昔避兵識師東林忘形儒墨結交
以心時有旦評稱師孝禪吾其敬之僧中子騫九流百
家問無不知吾其愛之僧中子期師之於予亦敬且愛

片言可觀如拾珠貝我歸故鄉師贍其別歲時音問往來不絕前年孟冬丈室信宿白雪陽春賡和舊曲寂滅樂矣師固云然我思故交中心悁悁擷茗陽羨斟泉錫山詞以抒情塔鈴吾言

夫祭妻文

於乎誰無夫婦琴瑟相友惟汝與吾憂患白首粵自世變家燬於兵扶老携幼蹠血宵征具區之山龍馬留跡祇觸藩籬幾中鋒鎬載歸故邑遭歲薦饑裾無完布簪

遺折箸而於舅姑菽水朝夕生事死葬與我僇力烽煙
滿眼人皆岷巖賴而內助匪義不為我擔耒耜爾躬井
臼長育二雛庶亦肯構所居三徙非效孟母全身遠害
以避豺虎內外服勤乃成此室昇疾來歸庶安且吉而
飲而食而言琅琅辭絕而逝悲風滿堂六十四年不失
婦道雖逢百罹卒逢壽考嗟我父子痛心如割骨肉恩
愛際此契濶歲時烝嘗誰為薦羞我暑誰葛我寒誰裘
風雨孤燈室與誰處齊眉之案誰為重舉宅兆斯卜祔

而姑嫜一酌永訣我淚其滂

兩祖祝文

維洪武九年歲在丙辰七月初四日不肖孝曾孫某等
敢昭告於某官之靈伏念某兒子木不幸逢豸冠之怒
無辜屯鳳陽之田骨肉生離肝腸痛割以卑悃陳詞於
烏府蒙大臣請命於丹墀欽承釋放之恩幸獲來歸之
喜雖風憲紀綱公道之力卓然行之非天地祖宗陰隲
之靈何以得此天無以報祖何可忘謹以蔬果酒饌之

儀用陳菲薦謹告

考妣祝文

伏念某兒子木屯田臨濠如落陷阱而某原其罪狀揆諸刑書為父者有可救之理於是扶慙觸熱赴臺陳訴幸而臺官垂憐轉而上聞玉音俞允放歸養親此恩固不敢忘也然某思之苟非蚤歲蒙父母教訓之力則惜於義理昧於法律視其子可援而不能奮身為之則為父之道有所未盡今也賴吾親之訓于昔年脫其子之

難於今日思其可忘乎況乎上之人所以矜恤所以釋
放使得仰事俯育而骨肉完聚者非天非祖宗有以相
之不能也嗚呼天無以報矣豺獮之敬聊表於親至如
父子受辱有玷先世其出於不幸而非繫乎不義而致
者惟天惟祖宗尚或宥之

外舅姑祝文

伏念某兒子木比遭禍而屯田今蒙恩而歸里親戚骨
肉重獲團圞其為外祖父母者死而有知其必哀憐眷

顧而陰相之也推情揆理義不能忘

三兄祝文

惟我長兄有幹蠱之才而不得其壽由是而家人失節
門祚陵替幽冥之中不能無憾也必矣然而幸存一息
以嗣烝嘗如未識丁兄必愛之不啻若已子耳頃惟竒
禍屯種濠梁豈不為之哀愍哉今蒙國恩歸奉菽水又
豈不為之陰祐乎生而孝友死必不殊區區哀思詞莫
能既

惟我二兄深嗜佛學早絕伉儷誓不與同室而生同穴而死也早育二子長令出贅幼為沙門兄則超然自謂在家出家矣避兵之日緇流與俱杳不知其所終此固兄之素願也然而某佩服儒訓雅愛人倫念同氣不宜泯絕命其子林以奉嘗焉今以木屯田而歸如獲再生如脫鼎鑊吾兄以佛氏之心為心亦必為之慈愍焉惟我四兄未壯而克家將娶而即世父母悲悼終身不忘諒吾兄於父母之子若孫亦不忘也如木者幸脫屯

種歸耕故隴以養其親以畜其妻子兄之喜為何如哉
兄無後人命吾子森嗣之以承祭祀尚其垂裕使得與
木等鼎峙而樹立也

姊及姊夫祭文

於乎賢姊之生愛弟深至視弟之子已子無異木之屯
田姊必憂恚以今還家必喜而慰憫予暮年遭時不利
父子汙辱有玷先世所自釋者中心無愧微姊復生孰
語於是嗟而子孫俱殄疫癘歲時禴嘗賴女承繼我今

摧頽百事俱廢念妙之心獨爾弗替妙夫善人義同昆季庶幾來格鑒此微意

祭母舅文

代陳彥高作

昔人有言見舅如母今我不見舅氏者閱四五年又何異別吾親之久乎瞻彼陽山追懷亂離脫萬死於虎口幸重逢於盛世然而陵谷變遷各天一涯舅甥之情惟天其知遭險人之排陷若參商而東西方鴻飛於魚網奮病翮而來歸聞舅疾而往問涉雨路之途泥承訃音

於中道乃匍匐而星馳顛崖之苦蒺藜之悲皆不能與
舅氏細數而陳之釋此憾者將何時耶言采溪蘋薦此
泂酌哀歌渭陽涕淚交落知乎不知神在冥漠

任仲文祭妻祖文

翁於女孫親愛所鍾愛及其夫情亦與同既玉其成加
以磨礱藻雖不才感恩之隆服勤左右龜勉厥躬歡然
菽水庭闈春融金澤之濱瓢湖之東居凡三徙天風轉
蓬今年夏秋巨浸溶溶賦歛之蛇毒於射工避地蘭陵

請謀吾翁去危而安翁樂其從瞻彼橫山滄海駐蓬將
營菟裘一晦之宮月有旬日往來憧憧豈其微疾藥石
罔功我方抱持瀟灑之供語音未絕瞑目而終嗟我夫
婦遭罹禍凶倚若泰山山頽倚空賴有大母同此哀恫
棺以黃楊衣衾重重恐茲永訣涕泗霑胸漱詞而醞以
寫愚衷

祭朱仲起文

生於東吳歿於西州七十四年陶朱之儔其生也有一

塵而弗處樂浮家以優游有二子而離居各專力於簞
裘其歿也繼室厚衣衾之具過百倍於黔婁女孫得藁
砧之良襄大事而能周視世之生不聊生死不得其死
者迺乎其不侔又何憾首邱之正與不耶某等或忝微
姻會晤無幾或傾蓋於東洲之濱或結隣於橫山之陞
聞哭聲而匍匐徒往救而弗起兔死狐悲矧吾人耳一
觴敬酌歌用蒿里

祭妻祖文 代楊彥澤作

昔在童州聞翁厚德邑之名門視為矜式遭時變故挈
家中吳人多覆轍翁行坦途陶朱之裝固有遺失食指
百餘乃保終吉陵谷既遷言歸故邱橋梓相須聿成菟
裘匪德之積曷云能爾陰隲自天灼見斯理如某不才
誤蒙采菲以孫妻之撫愛莫比每至甥館誨言諄諄俯
育之意盎然如春及翁卧疴或輟或作往來問安眷顧
如昨七十八年如旦而暮眎諸天闕實有餘祐所可悲
者永別終天女孫歸寧誰其眷憐某于羹牆思亦罔極

薦此溪蘋灑淚霑臆

祭鄒忠公墓文

公遊程門游楊比肩慎獨之學首得其傳孝於事親如
曾如騫移孝為忠厥德兼全補袞之闕蒲伏涕漣數惇
六罪羣邪凜然奈何城狐威福得專推落陷阱炎風瘴
煙忤物固爾精誠動天遐陬峻嶺感應有泉處困而亨
斯文究研既釋論孟復解韋編羲文姬孔墓塋見焉蔽
日雲開暫脫迤邐再寵再辱愈磨愈堅明月之珠羶光

九淵鳳穴有雛赤霄翩翩暴白先志誣讎悉蠲德薰晉
鄙垂四百年顯忠有祠奉嘗有田由宋而元有司豆籩
度守是邦追慕昔賢詢諸遺黎知公故阡增土鬣封起
碑之顛樵牧有禁溪山連延何以奠之秋菊寒泉仰止
高風服膺拳拳尚享

祭陳氏親母文

代曹子壽作

惟靈生衣冠之茂族作佳配於潁川相夫子以無違實
四德之兼全出鳳雛于丹穴奮彩翮之翩翩翬熊丸之教

有法掌珠之愛弗偏予是以有東牀之選蓋亦慕北堂
之賢方鳳占之叶吉結朱陳之姻媿何飄風之不情折
萱花於歟然葭莩黯乎其失色朝露若為之涕漣念九
泉之永訣酒三醖於柩前靈洋洋其如在鑒此意之勤
拳

子祭母文

代陳煥章作

嗚呼三子早孤皇皇疇依賴有慈親恩斯勤斯非徒養
之而又有以教之視我三子掌珠之惜遭時艱危基業

蕩析萬死一生幸遇鋒鏑徒茲渴濱苟焉休息其不滿
於吾親之心者一子一孫介冑而歿居侍旁者但供其
菽水習史業者常離於朝夕每勞乎倚門之望鮮能遂
板輿之適所幸時康方安厥居孰謂微疾遽然云徂方
巫醫之並用竟永棄其諸孤嗚呼痛哉而今而後雖日
用三牲之養而吾親無復為之娛矣一抔之土無復定
於吳矣徒感傷於風木媿返哺之慈烏奉觴永訣肝腸
若割

祭陳母文 代陳彥直作

生長勾吳秀鍾林屋有林下風四德之淑隨世變遷家
此溪曲鄉稱姆儀徽音馥郁熊丸教子峙若鼎足伯為
督家仲則戎服季也刀筆縉紳刮目甘輒之供如食厚
祿斑衣諸子森如立竹春藹慈闈家用雍睦壽踰稀年
歿有餘福季歸自公撫棺慟哭烏烏之情悲乃風木里
不卷歌弔者接躅某等姆儀之敬義當蒲伏言采溪毛
薦此醴醕肝蠻有靈眎同芻束

又代李一泉等作

孟母以斷機教子成其子為亞聖陶母以剪髮待賓致其子有大名世之為人母者苟能有其遺風則其子亦必有可稱者矣若我陳母遺風伊何教子之功不鮮待賓之禮亦多昭哉彼蒼降福洋洋八十指子孫之盛七十三壽考之長東隣西舍愛同六親簞食豆羹饗如八珍為一境之姆儀誠四德之淑人倏爾云歿孰不酸辛時無張林叔德弗碑劉向不作立傳者誰我酌此卮我

陳此辭亦庶幾乎薤露之悲彤管之貽也歟

祭萬氏子文

人與萬物一氣所鍾何乾坤之為父母有賦予之不同
顏路之子聖師之賢胡不永其年耶柳季之兄凶黷赫
烈胡不使短折耶美牛山之木而厄於牛羊戕於斧斤
彼樗櫟之不才乃壽輪囷放臬囚鳳則足麒麟若吾甥
之淳朴孝敬而夭者皆莫曉乎混淪某等悲痛雪涕敢
一問乎大鈞天雖不言聞必酸辛持杯酒以吊窮泉之

幽魄亦以慰高堂之老親親乎親乎慎勿為卜商氏之
喪明徒貽誚於聖人嗚呼彼蒼聞乎不聞

祭沈氏女文

維洪武十二年十一月初八日老姨公攜其子以酒肉
祭於姨孫女沈氏之靈曰汝之父與吾子為弟吾之孫
中選汝父之雀屏今也如寶鏡之破於未照玉簪之折
於未成傷矣哉吾父子之情傷矣哉吾父子之情

又

某年月日老姨婆與姑娘等以酒果家饌奠於時娘柩前嗚呼痛哉汝之生也母亡於七歲之初使汝不得蒙其撫養汝之死也父役於千里之外汝不能與之訣別未筭而善事繼母久病而不弛女紅是皆可哀可憐而可憾者嗟哉彼蒼何彭何殤骨肉之悲寓此一觴

祭外祖文

代上海任仲文作

翁於外孫恩德俱厚三孫之中藻為最幼維其幼也特恐愚陋其愛尤深加之訓誘翁自中年無心組綬湖山

秋九風月杯酒幽花秀竹蒲石清繆翁於其間婆娑白
首陵谷之變干戈日久危而復安賴天之祐八十八年
可謂遐壽為鄉善人其德亦懋甥孫紛然日在左右藻
則出贅翁為擇偶桑梓連陰聲聞雞狗犁鉏畝畝復客桐
江數月宿留廢禮百端辭莫能究比聞訃音痛心如剖
匍匐而歸豈云敢後以病莫前徒抱哀痛瓢湖之水難
洗厥咎翁其憫之庶幾原宥雪涕陳情薦此簞豆

為曹元度祭姑夫鄒桂堂文

昔魯義姑抱姪遺子恩難兩絕義重如此公篤於親如
姑之情撫視其姪同乎所生念某昆弟稚孺而孤適逢
亂離干戈九區垂涸之鱗蒙激滄波無依之鵲乃棲瓊
柯恩以畜之義以淑之威儀語言教且勗之人皆蒺藜
我則衽席居吳數年如一朝夕陵谷變改公還故鄉某
亦里居烜以餘光咄彼青蠅竟浣白璧投畀遐荒混淆
瓦礫咸謂貂蟬將出甕釜天定勝人無悔無尤云何不
吊廼涉重坎訃音之來痛割肝膽丈夫馬革死不顧身

惟其骨肉極切悲辛巫陽之招魂其來歸桂子秋風高
堂總惟知恩罔酬義茂以報見公羹牆淚滿懷抱魯之
義姑我姑之夫書以厚俗疇茲董狐

祭徐達卿文

往昔避兵衆依于仁纍纍乎喪家之狗躍躍乎脫網之
鷹公之視予騶虞麒麟暖蘭湯而濯足下懸榻而重茵
館婦子於別室撫臧獲如所親不以俗之數米而炊者以
玉其粒不以時有析骸而爨者以桂其薪或戚或疎恩

惠俱臻長筵燕集禮意慙慙是故人皆以和氣氤氲喜
色津津忘憂於板蕩之秋湛樂於熙臺之春殆若古桃
源之避秦也別公數年滄海飛塵干戈阻絕公歿不聞
迨歸里而聞之日羈縻於世紛欲一酌僑玄之墓閱屢
歲而因循竊嘗論之世衰俗薄徇利忘義者什常八九
公乃磊磊落落猶獨鶴之住雞羣然一飯之報吾志弗
信抑亦有愧於古人瞻彼膠山如隔兩塵舉匏樽以澆
墳上之土頌遺愛而云云酸風撼林嗚呼孔賓

為陳以貞祭王母文

昔在故里婦德著稱鍾禮郝法容儀具并暨孀居之一
紀羗玉潔而冰清今居蘭城母儀之懿捧檄有孫盡歡
甘旨奉重闈之慈訓謹操持於胥吏故凡葭莩之親桑
梓之共莫不愛之敬之尊仰乎林下之風也樂善之性
本出天賦口不絕西佛之名如渴飲乎甘露其心愈慈
其髮半素諸兒女之通家每升堂而拜母起居問安匪
朝伊暮方菊月之下旬捧壽觴於初度安知彼蒼災祥

竝臻賢孫有鶚書之薦大母則病入於膏肓亟藥罔功
遽爾云亡正所謂賀者在門吊者在閭變怡懌為盡傷
矣衰經之孫躡踊哭泣令伯之哀表人皆為之嗚咽
不有形管孰記高節采湧浦之寒藻薦郢筒之香雪拭
淚陳辭千載之別

祭崑山張伯仁文

洪武之初傾蓋如故買宅買隣日益清顧於時蘇城樓
櫓灰飛公脫陷阱欣然而歸人之所稱百鶚一鶚有猷

有為抑強挾弱我所見者厚葬其父故舊不遺保障鄉
土數載之交視同懿親為公所憂里多荆榛縛虎而縱
反遭其嚙鵠鷗夜啼興妖作孽室雖有繼卒以無嗣播
遷臨濠日以毀賴女之嫁者遽失其良兩婿承家池魚
並殃公在異鄉寸心千里骨肉傷殘痛何可已一紀之
別老我於家每聞奇禍為公怨嗟蒼天蒼天斯人何辜
困厄摧折乃至此乎客來今春謂公蒙恩難兄難弟同
歸故園予欲賀之恨臂不飛以詩言情不勝瞻依安知

隔歲公已物故集師書來我淚如雨追念疇昔肝膽相知各天一方徒云坐馳面不復晤魂其可招悲歌些辭酌此一瓢

生日祀考妣祝文

父母生不肖八十六年矣不肖雖不能為賢人君子為世矜式然未嘗敢為小人之不減也雖不富不貴不能顯榮其親亦未嘗飢寒失節以辱先也長太平之時則微樹其業遭亂離之日而不殲於兵夫妻老者暖衣飽

食早眠晏起不憂不慮以安以娛是皆天地之大恩父母之遺澤也蒙天地父母之恩澤其可忘乎其可忘乎所願者子子孫孫中外和睦瓜瓞延蔓荆棘不生使不肖夫婦如是安娛以盡其天年不久牀褥全歸遺體尚賴天地父母之靈有以陰相之始生之日醺酒以告

冬至祀外舅外姑祝文

嗚呼悲哉仁而無後斯理之變而又遭世之大變也三子八孫靡有噍類所遺之業盡屬他人顧為女為婿者

耄無能為竟不能為立後人以為似續以承祭祀每一
思之慚色而已歎息流涕而已惟茲一陽薦此蘋藻溪
毛匪薦薦以此心靈之鑒之憫其所不能為者宜宥厥
辜

祭唐親家母文

代陳以貞母氏作

德為母儀五十九年見而知者罔不稱賢昔我冢子多
幸自天雀屏中選以女儷焉主我中饋毫忽罔愆母教
之淑豈容忘筌昔在鄉里絲蘿纏綿今居毘陵同居一

屢姻婭之情益加於先靈在牀褥久弗能痊曰女曰婿
常侍榻前我來問安飲食留連今也云亡骨肉棄捐為
子婿者公務所牽羈旅金陵未能言還女以孳育月輪
未圓棺弗能憑繚麻涕漣垂髻末孫其哀亦然我念疇
昔淚如迸泉有菲蘋藻供陳几筵靈其如在鑒此惓惓

祭表伯母文

代王仲孚作

昔居故里家為比隣綿綿瓜葛如朱如陳今茲異鄉亦
復如舊通家往還情日益厚靈以沉疴一載之餘匪朝

伊夕候詢起居若我婦子均蒙眷顧食必分甘骨肉相
處孚方驅馳信宿而歸靈乃即世幽明永違匍匐往救
已不可得陳此薄奠涕淚霑臆

祭王君壽文

昔在西塾廿有餘年公之父叔坐予講壇愛我敬我如
骨肉然公於此時鴈行聯翩敬以父執禮意勤拳規行
矩步靡不勉旃厥後一別陵谷變遷公守故丘我落海
邊萬死一生脫身戈鋌我東來歸公喜自悲喜獲再見

悲歷艱危冠玉之美殘為瘡痍樓臺廣居化為茅茨衣
不文繡緼袍為宜食忘八珍啜菽如飴樹菊軒堦杖履
棲遲幹蠱有子蔚乎孫枝樂事以酒餘皆弗治佳哉蔗
境為鄉白眉吾嘗鼓琴渴浦之湄連城屢宿細論昔時
負笈之孫服受我詩自茲以來別多會稀花朝月夕每
有所思去年暮冬尺書載馳緣有義事要公共為安知
踰月遽然其萎偶出西關路聞葬期彼祖輓者舟欲同
移眸子眇昏行且尼之送不執紼奠莫奉卮烈塘之東

傍徨涕洟還家數日晝夜忸怩緬維前賢絮酒千里嗟
今之人跬步或弛朋友道喪恬不為耻擷此溪毛陳詞
尺紙物薄情深公必鑒之

祭妻文

嗚呼悲哉靈年八十以微疾不兩日而亡人皆謂天錫
之福子孫滿堂衣食而斂瘞之高岡并餘一紀家居樂
康既葬而隣里騷然紛捉軍而驚惶使襄事之日而過
之則惡乎有數百之人祭奠於北堂縞衣而送喪也未

幾而李子森為人謀陷嫁禍其身我扶憊而赴救詣郡
邑而具陳刀筆之吏欺天罔人妄移文於崑邑欲玉石
之俱焚賴公道不泯如屈蠖之得伸雪理而歸父子悲
辛以今思之六十年伉儷常居安而欣欣雖世變之秋
避兵海濱亦未嘗遭此之不仁信乎吾細君有可福之
善蒙陰相於大鈞也耶卒哭之祭遂致目闕死而有知
不必我嗔吾知母之慈子必哀憐其遘逆奈何死生幽
明之分兒哭之慟我亦霑巾嗚呼哀哉

祭張溝南先生文

維洪武十六年月日同郡老友謝蘭謹遣孫塏以清酌
庶羞之奠致祭於故心友溝南先生之靈曰於乎近年
者英晨星落落公在鄉邦雞羣獨鶴詩三百篇精華咀
嚼吐而為光光輝焯焯粵自蚤歲蜚聲臺閣遭時多艱
屢進屢却歸來故山雲卧一壑洪武更化羣髦進趨克
窺有子首應而須手持直筆追縱董狐如哲有參養志
而娛寶樹遽折悲風叫呼公無怨尤曰命矣夫中郎之

女傳業於家丙申暮春郡志有作時我與公同秉筆削
甲可乙否語皆良藥別來數載心交如昨愛及吾兒義
尤不薄前年過我新秋夜涼中庭夜坐月白如霜劇談
千古把酒淋浪興盡而去東方未明去年夏五我兒云
亡公為墓銘九原有光吊我唁我喻以大方斗城之別
譙門夕陽自冬徂夏人多讚揚優哉悠哉新居草堂幽
花秀石池島滄浪不徒玩物世慮俱忘顧我潦倒理宜
溘先安知矍鑠乃在吾前四月九日計音忽傳無妄之

災網羅正纏葬不克送酒不漬綿每一思之淚如迸泉
病目昏盲舉步欲顛塏持瓣香拜於靈筵鮑叔知我鑒
此勤惓

姪婦祭姨母文

昔侍姨母東吳避兵我姑繾綣諸婦奉承及歸桑梓半
舍之隔歲時問候眷焉如昔今我娣姒等哭姑之淚未
乾而又哭姨母而永違母乎母乎見我姑於地下其能說
諸婦之哀思乎溪蘋拂霜薦此一觴阿翁悵悵作此祭

章

代常信孚祭親家母文

曩予之家幹蠱乏人賢郎贅居蒙養而姻維時魚軒雲
從析析繫我婦子獲瞻母儀事雖從權恚如所願舉室
驩然親親眷眷去年合卺蒙饋菹蘭愛予及婦恩出肺
肝顧予東牀每歸問安慈愛之深尚蒙垂訓所可喜者
起居樂康予嘗詣門亦得升堂別來未幾聞有隱憂豈
意成疾竟弗能瘳訃音忽至婦子匍匐泣血呼天救不

可得我來柩前奠此束芻區區哀忱靈其鑒諸

冬至祭母文代木森作

嗚呼痛哉每年冬至齋宿祀先母率諸婦供具酒食今也中饋或有缺失誰懇懇而勗之耶每年冬至賀客過門母語諸婦治具饗殮今也禮意或有懈怠誰諄諄而命之耶一味之甘誰分諸幼耶糗餌之屬誰饌諸隣里耶是則因節序而追感者如此至若子孫之有室皆吾母擇配而為之子之婦孫之婦其婦工有未善者皆吾

母教而成之平居之日甘旨裘葛之奉則吾母弗求其
備溫清定省之禮或有疾則終日終夜未之濠梁屯種
森之滕州被刼林之客死新鄭吾母為之廢寢忘食晝
夜憂思痛苦哭幾喪明慈愛之情言莫能盡如此之恩
又皆在劬勞罔極之外今子之死者固不能報其生而
存者將何以報其萬一耶母兮母兮無復見兮寫此哀
衷矢弗諼於遠兮

祝亡子文

洪武十六年十一月二十一日老父命汝弟森持思賢錄一簿置汝靈几酌之酒而祝之曰往歲板刻辯惑編既成汝嘗執書立吾前而言曰不圖今日遂二十年之所願欲矣汝於此時喜容可掬吾知吾兒推心父腹繼而摘稿尤喜成速携二書之新行不兩期而瞑目今老父偶逢於知己又為刻思賢之錄此汝之所寫者稍撙節其簡牘工數月而就緒我已盲其雙目摩挲紙本無復能讀於乎誰念其為之不易寶之如玉邪誰為其喜

而傳之士夫俾咸丐乎道鄉先生之膏馥邪悲哉吾兒身不可贖置此書於靈几猶挂劍於宰木顧觸屏之子若孫絃將斷而復續覩物思人淚霑汗竹

祭母舅文

代東洲黃氏作

嗚呼見舅如母念母不忘舅復厭世豈不永傷若我舅甥世居邑里如鳥同林穀育棲止版圖之謬牽連伏辜天恩汪濊姑緩其罰脫網之魚頰尾發發七里八岡水溢溝澮載欣載奔過都歷塊蒼髮黧面泥土裳衣忘乃

劬勞負疾而歸賀者在門退不旋踵吊者之來乃哭而
慟如某至親洎諸姻婭痛不可忍涕淚交瀉將來休戚
無復相知俯漉肝膽酹此一卮

祭賀彥銘文

代陳彥高作

南華有言曰上壽百歲中壽八十下壽六十一月之間
得開口而笑者或四五日而不能及也况遭世之岌岌
乎如公之生垂及中壽喬木故不為不茂遇陵谷之變
遷若摧枯而拉朽坐衣冠於塗炭脫性命於虎口元龍

之豪氣雖衰丹穴之鳳雛方雛俄陸海之風波沉鐵船
而莫救有竹林之小阮尚枝梧於左右五六年憂患之
中能一笑如南華所言者亦烏有也嗚呼哀哉凡我親
舊居同里閭因蒺藜於世變之日煦酒輒於濡沫之餘
犁鉏乎荆棘之場屋廬乎瓦礫之區若夔蛇之相憐不
戚施而遽蔭吉凶慶吊出入起居或叙情於杯酒澆磊
落而歎歎今也云亡痛當何如奠椒漿於三寵墮清淚
如蛟珠悲風愁雲送乃輶車

祭妹文

嗟我先世錫山故鄉曰朱曰陳閭閻相當乃以吾妹嬪
朱之良為婦而賢孝於姑嫜陵谷一變雲萍四方念我
兵餘如龜穴藏聿來依棲隣壁分光爾居再遷半舍相
望手足之情眷眷弗忘常念吾甥來我渭陽吾兒念姑
安問亦常焉知微疾遽爾云亡朱陳六親罔不痛傷况
予潦倒孤鴈遑遑憑棺飲泣奠此壺漿

祭妻兄文

大哉天之所以為天兮宰萬物而幽玄雖陵谷而變改
兮恒福善而弗愆觀若人之始終兮蒙陰臨於彼蒼避
戎馬於勾吳兮涉畏境如康莊聚原鵠以救急兮作歸
鴈之同行舍故土之荒穢兮樹豐業於豎陽託家政於
仲氏兮日娛客以壺觴肆優游於桑榆之景兮家有餘
慶蹇予早歲有室兮得名門之女弟賴昆季之眷顧兮
於今四紀睠小阮亦僥倖兮辱妻以其弟之子悵東西
之相望兮多契濶而會少比安問而抵家兮喜棣萼之

俱好孰謂別無兩月兮聞訃音而絕倒恻余室中之人
兮姑與姪其同悲徒匍匐而莫能救兮淚滂沱而霑衣
奠椒漿而永別兮叙平生而陳辭

除服祭母文

二月十四日為
兒子木等作

齊衰母服也三年之喪猶卒哭而再祥禫而除其服者
古之制也然劬勞重恩罔克有報孝思之心有不能隨
服而除者也於是撤靈帷於斯寢奉神主於祠堂歲時
烝嘗寓不忘之意也不忘者何敬與愛也凡吾親之所

敬者敬之所愛者愛之則親之死猶無死也苟忘其親則親之故舊或踈如途人親之孫子交惡為仇敵也以若所為是不孝也觀夫孝之至者通神明不孝者必獲戾於神明也過庭之訓諄諄有年勉而行之請質諸母之靈也天心陳詞終身戒也

遷祖考神主祝文

嘗聞祠堂之制當設四龕以祀四世之親不肖幼年在父兄之側失記高祖考官稱高祖妣姓氏故曩於兵後

立神主由曾祖及禰而已虛設第一龕於茲數年今因
亡妻喪既終其子木等奉母主入祠敢請遷曾祖居第
一龕曰祖曰禰從而遷之以第四龕安奉其母任氏候
應芳之歿然後改題高曾祖禰稱號也不肖違失禮制
不能無罪惟尊靈恕之

寒食祭曾祖墓祝文

項賴先世德澤未泯瓜瓞遺蔓幸繼烝嘗時維禁煙
隨俗展墓匪云報本庶不敢忘伏維尚饗

祭祖禰墓祝文

墓祭非古也以應芳不肖不克歸里不能以時省掃常愧於心每年寒食展拜墓下豺獺之意庶效萬一尚冀先澤垂裕後人有永弗替

墓祭母弟祝文

代木等作

寒食墓祭雖狗俗禮為子孫者哀慕省掃亦庶幾豺獺報本之意焉惟慈母賢弟魂魄有靈必蒙歆格

墓祭先兄祝文

父母遺體本有三兄仲兄避世不知所終伯兄季兄並
寔於此時維寒食祭掃荒丘手足之情庶乎不忘

娶孫婦祭祖祝文

維洪武十八年歲次乙丑三月初四日乙丑孝曾孫應
芳等以孫男塤於初五日丙寅吉辰娶本縣安豐南鄉
呂氏女為妻敢昭告於某官曰娶婦三月而廟見者古
婚禮也近代之制以日代月各有義焉應芳輒敢忝
酌古今從宜從俗擬於翼日親迎婦初入門先當謁拜

先世以見不敢忘本之意然後祇見舅姑及諸姻眷自茲以往庶得奉承宗祀蔓延嗣續尚賴遺澤垂裕弗替謹以清酌庶羞前期祇薦謹告

祭徐仲清文

嗚呼九流百家玉石混錯公隱於醫常之一鶚黃岐之書孰云不知公得其要探玄索微如古兵法時用出奇博議閎辨吐屑霏霏蜚英蚤年鄉評衆推紫燕歷塊非貽可希遭時艱危挈家勾吳藥石之靈字及豚魚長蛇

當路報亦銜珠以之事親厚養為娛春風杏林名聲載
途所不忘者首丘如狐大明開天四海一家父母之邦
青氈故廬徵車聿至乃赴清都醫國之忠老莫能輸謁
告而還子孫怡愉蜂房合戶哺雀羣鳥混迹市塵懸我
藥壺衛生之仁施於州閭佳哉蔗境餘人所無衣冠敬
共鬚眉皓如應芳忝交四世於此公有佳兒與我中子
同業於儒同出而仕惟余不猶一生一死公恤其孤與
諸孫齒誘掖激昂誨言提耳老我墻東相望尺咫頻年

喪明跬步千里時蒙問訊或饋藥餌心親迹踈匪負知
已今公闔棺事皆定矣我未能然望風長喟束芻授孫
往奠靈几玉雪之姿羹牆宛爾載歌薤露商飈歛起願
言從遊脫屣滓泥存順沒寧庶幾無愧

遷葬二兄祝文

九月二十六日

元歷垂盡時盜之槌領珠斷釧臂無處無之嗟我二兄
荒郊廢塚雖有後人漫不省視與無人同薪者芻者為
樵牧場而犁鋤者日侵月削又將為禾黍區矣應芳以

同氣之通是可忍乎今重製二函遷瘞祖壠東南隅以
祔大父母父母及諸父之側竝封如前蔭以竹木歲時
酒飲庶得享而侑食焉惟兄有靈安茲幽宅

諸親友祭曹子壽文

古之人有言狐死兔悲物傷其類況人為物靈居同閭
里有瓜葛之親朋友之義者乎又況子壽之為人善與
人交而有春風和氣者乎居常往來杯酒為禮或有時
而合歡雪襟懷之凝滯奈何輶釜之聲瓶罍之耻往往

鮮克遂其意也歔歔慷慨音猶在耳一月之餘痿而弗起屬續未定而闔棺訃音裁至而發柩東方載明藁裡亟奄於橫山之址凡我親朋惆悵而已其為骨肉至親者又何忍而至於若是耶溪毛洞酌亟奠靈几遂成永違顙而有泚

祭唐仲傑文

公之子吾子之門弟子也吾之孫公以小友呼之過愛而忘其齒也垣雖失怙如飲食數載慶吊吉凶且能惓

倦乎盡其禮也今公之歿胥靡也哉古人月明千里再
歌些詞魂兮歸兮寓永傷於匏樽一酌乎落花流水

祭劉德祥親家文

人皆謂公有通濟之才設施之方且見識之長何始終
之乖張吾嘗以為江河之舟視舶而微非葦而杭能重
載而遠適可周流於四方或長河順流懸帆巨槳一日
千里快若飛黃或大江水逆石尤風狂釘石繫纜隨波
低昂或脫難於盤渦或經險於吕梁或候潮而逗遛或

阻水而徬徨安知一夕怒濤春撞盲颺簸颺遂顛覆於
鮫鯢之鄉嗚呼哀哉十四年間安危變遷以資稟之高
明知有命之在天不怨不尤處之泰然鄉之評旦前後
可甄有可稱於後者何異乎青史之傳嗚呼哀哉如某
者昔在東關隣比相依承公以鍾愛之女為吾孫阿塏
之妻雖別多而會少獲通家而往來每黃耳之有信知
告老而有期擬祖孫同迓呼麴生以洗泥訃音忽至招
魂來歸塏也哭婦翁於四千里之外奈此願之乖違兩

兒扶持莫此一庀文以抒承葛之情詩以寫薤露之悲
公知不知我洒霑衣

生日祀先祝文

某之生斯世也九十一年每念劬勞罔克有報也然視
不明聽不聰而猶有可覩之物可聞之聲肢體雖頽猶
能杖而行几而坐也方寸之天不蔽於私義理昭著而
能燭物是皆生我教我者之大恩也先世之恩報雖不
能實未忘乎心也況夫左右服勞飲食裒葛內外有人

老老幼幼頗知義方非祖考垂裕之力焉能得如是之樂也自今以往天年未盡喘息未絕皆感戴之日也家饋殺羞先用祭享亦庶乎豺獮之報本也

祭徐子忠文

代席彥適作

旦必有暮死生奈何或玉闕之不入或薤露之有歌或馬草裹於外域或魚腹葬於汨羅是皆卓犖之士去鄉井捐首丘而忘其考槃之阿也今公之歿類乎古人論公平昔良可悲辛其家居也克肖而翁持身以儉約勤

苦待人以和氣春風其戶役也羈縻長安夢方尋於失
鹿事乃畢於蓋棺嗚呼三子鼎峙峙乃公餘銜哀服勤
惟恐顛覆雖匍匐而莫救望鍾山而慟哭東牀佳婿淚
亦盈掬如某既忝姻婭且居鄉曲惓惓乎叶力同心董
征輸之萬斛覩丹旄之來歸極感愴於心目蓉湖采蘋
薦此醴醕

武進縣學立先賢祠祭文

代陳知縣
易縣丞作

昔之人以鄭公之賢而名其鄉以荀淑之子而里名高

陽蓋地因人勝使山川人物皆為之有光今夫三先生之產茲邑也道學之傳淵源二程發揮道妙有功遺經効當國以滔天之罪而貝錦乃成諫至尊以正始之道而逆鱗敢櫻觀夫感應之泉醉客之語則忠義之至通乎神明若夫由大魁而演綸叅大政而憂國者位雖不同同乎一誠輔崇寧之初政知秦蔡之匪賢俄梁木之俱壞徒流芳於汗青是皆可以為天下之師表百世之儀型豈特為鄉里之榮哉某等叨蒙國恩民社之寄以

先生祠諸學宮是亦祭於社之遺意說說諸生奔走榮
盛如將見之于牆于墓霑德薰於晉鄙何以異乎師承
吾將見金鐘之識復靈劍之聿興

謝莊曾祖墓清明祝文

某嘗聞先世開封渡江蕃盛東西謝莊地因人姓三百
年來陵谷變遷自高而上故壠茫然睠茲衰丘鬱鬱如
許即彼侵疆為外侮禦匝植松楸幽篁翳之弗樵弗牧周
垣衛之寒食清明聿來省掃追遠者心安此繁蔭尚享

新河口祖墓祝文

丘墓之祭禮無所考然俗禮以清明祭掃其來尚矣苟
於此以盡其誠亦庶豺獺報本之意也幽明雖殊有感
斯應所謂洋洋如在者將見諸墓塋見諸堂封斧封馬
鬣封也某等雖不肖無似尚期垂裕以衍餘澤繼述弗
替尚享

先考忌日祝文

父母之恩人皆罔極惟吾父之鍾愛於某也既生之又

能擇師而教之使日就琢磨黽勉樹立雖不克能馳驅
取青紫以舉其身以顯其親以澤其後人然此身賴訓
育之力不姦不邪不淪胥於習俗之陋於先世無甚忝
辱子若孫則矯枉就正識之無於農圃之間而我杖履
所至晏然棲息無飢無憂是皆吾親之遺澤未泯也此
恩此德之死不忘惟茲忌辰祇陳澗酌以鳴其感悰恭
請顯妣石氏安人同賜假享謹告

祝先致語 代丁學古作

奉先思孝聖賢之訓甚明事死如生祖考之靈可格焚香代鬱鬯之灌秉燭為庭燎之光雖無鐘鼓鏗鏘惟是亘邇奔走志意追思於齋戒儀容宛見於羹牆蘋蘩蕝蓼之毛靈筵可薦參苓姜桂之物相籠親儲谷陵兩變於頻年城郭一廛於今日如繩祖武勉讀父書豚魚或昧於交孚時加修省豺獾粗知於報本歲奉烝嘗伏願濯濯厥靈洋洋如在灾不生禍不作正賴乎厦屋帡幪居之安資之深何異乎門閭高大根深蒂固地久天長

初進酒

生不封侯賜酒泉
無人死作酒中仙
一杯初進葡萄醪
且喜家庭有象賢
苾苾芬芬一豆羹
丹衷寸許若葵傾
我祖我宗應歡喜
自幸厨無轅釜聲

再進酒饌

銀燭生花再舉觴
滿堂渾是鬱金香
愁多莫問人間世
年少多為地下郎
不識駝峰翠釜烹
羹名錦帶亦虛稱
一杯骨董如芹獻
五味調和意盡誠

三進酒饌

孤兒碌碌混泥塵華胄遙遙出縉紳
百拜勉循三獻禮一年祇薦四時新
廟堂調鼎用鹽梅四海蒼生笑口
開我手幸無窮鬼捩折旋三獻奉羹杯

進饅頭

籠餅炊來玉屑香貽年喜得歲豐穰
賢如脫粟晏平仲應笑縮葱侯侍郎

送靈致語

切以欲表孝情勉循俗禮焚楮錢以代幣意在殷勤酌桂酒以送靈魂歸寥廓下情不勝感愴之至

祭曹子毅大使文

代諸親作

萬物之靈莫靈於人然人以異於物者秉藝方寸之天不和而公不偽而真也惟靈身無毀傷不辱其親口無萋斐亦近乎仁不汲汲以肥家不戚戚於謀身西園鬻爵乘時取名東陵種瓜避時辭榮是皆過不吝改而復其天真至若愛女而嫁不贅婿而效秦視其弟之子猶子

意終老以歡忻非明理而能之乎彼昧於理而不能然者寧不汎頽於泉下貽誚於鄉鄰某等親舊交接敬恭相於悵幽冥之永別感涕泗而歎歔輒車發剝奠此束芻

子祭父文

代奔牛陳明遠兄弟作

哀哀父母生我劬勞欲報之德昊天罔極此尼山聖人刪詩三百存此言為萬世之訓也凡為人子者報親之心其可忘也況某某之痛親尤有甚於常人者元歷之

末兵戈數年委棄桑梓流離異鄉其生也不能盡菽水
之歡其歿也不能求宅兆之安陵谷之變丘壠之失仰
愧俯忤無可奈何於茲又隔一宇宙矣今也倣昔人衣
冠之葬葬以木主巫陽些歌雙魂來歸於以寓安厝之
禮於以表追遠之心非敢謂報親之萬一也於乎哀哉
於乎痛哉

祭姊丈何子潤文

代侯德名作

猗歟吾姊得配君子梁鴻孟光隱德可比瞻我弟昆骨

肉無異賓朋之交或臧或否坦率忤物豈無微類於乎
蒼天禍福倚伏乃著戎衣往後安陸折柳郡城別淚盈
掬十年夢寐每論衷曲黃耳書歸殷勤齒錄路越四千
親愛愈篤尚聞矍鑠慰我翼翼安知訃音遽云瞑目生
還玉闕無復可卜於乎蒼天何怨何尤嗟嗟我嬖舉案
無由兩地共哭痛心如抽爰命巫陽招魂道周香雪一
觥薦此蘋羞魂兮魂兮來歸首丘

祭金親家文

代表茂御作金以運糧遼東巨船
五十餘隻官吏役夫千餘人回途

遭風覆
舟而溺

於乎平地風波陸沉者多航海而役奈颶母何魚腸葬
兮渺茫散精靈兮八荒巫陽銜哀兮籲穹蒼白雲悠悠
兮歸故鄉大矣哉尾閭無底渤海無邊非精衛之石可
填豈彭咸之居能遷魂兮來歸閭井依然雙親能保其
妻子一弟服勤而力田逍遙倘佯何異乎生前某等葭
莩之親鄉曲之情援溺之手罔措將迎之意宜傾言采
溪毛薦此一觥

祭湯母文

代呂輔之等作

惟靈春秋八十有七年林下高風鄉稱姆儀耳聰目明
老而弗衰盡三從之道全四體之歸其早歲之事非所
詳知請以晚年所見而知者頌之男婚女嫁各得其時
愛其男及其婦則能盡其慈親其女及其婿則無偏無
私其諸卑幼愛亦如之視姻眷如骨肉待隣里無陵夷
故其病也人皆扶持其歿也人皆涕洟而今而後侍奉
無期區區酌東洲之水擷橫山之薇於以見親親之情

於以表戀戀之悲靈其不昧鑒此哀詞

祭重外甥女周氏文

維洪武二十四年十一月日龜巢老人謝舅翁攜子及
孫以清酌庶羞祭汝重外甥周氏娘子告之曰人不幸
遇世變而俘於兵如風雨落花藩溷泥途鮮或不汚汝
乃釋係累以配二千石之子宜其家而悅於舅姑此不
幸中之幸非人之所能圖也至如一念之孝念母孀居
廿餘年抱歸寧之願百餘舍涉艱關之途德哉良人能

與之俱服齊衰以終其喪脫簪珥以恤其家睦我東翁
母嘗託孤亦欲報之以瓊琚凡如此類竹帛可書則昔
之所幸者抑亦有感於天而天賜之扶輿也今也一疾
斯須朝露溘然鬣封象服慈親墓田第良人之悲有未
葬之親未筭之女汝何忍乎舍旃吾意汝視斯世斯身
履冰臨淵玉石俱焚萬萬千千保遺體之全歸餘無憾
於九泉寥寥旌善亭令名誰為傳於乎蒼天

代曹原度祭黃仲器文

公平生與某為忘年交年雖不同身同澤臞章杜桑麻
叔牙夷吾舊雨有時而契濶令雨有時而招呼往往來
來曾不計誰數而誰疏也夫以公晚歲言之一子出贅
鼓盆自娛或蒼頭而詩卷或長鬚而酒壺或載月剡溪
之舟或踏雪灞橋之驢尋梅看竹清興逸如故人謂公
為荷篠荷蕢之徒嗚呼公之闔棺之日某客東吳不救
喪於匍匐不送喪於泥途每一思之涕泗霑裾酌彼潢
潦薦茲束芻

謝莊墓祭祝文

開封舊家軒冕烈塘隨龍渡江菴宅茲方豈無佳城海
水尋田敬惟高堂祖封歸然清明祭掃豺獫遺意尚期
垂裕有永弗替

烈塘墓祭祝文

人本乎祖猶物之天化育之恩疇能盡然維曾大父承
烝蔓延幽幽殯宮宅此平原左三從祖我祖右偏兩伯
遷祔雙璧仍連五封十靈餘皆茫然天荒地老陵谷變

遷尚賴遺澤箕裘勉旃清明省掃薦此蘋蘩霜露之悲
永矢弗諼

橫山墓祭祝文

代子木作

哀哉慈親寂寞九泉吾弟與姪亦遽然而然言之痛心
有不能忘其言也夫親在則晨昏定省親歿則春秋祭
祀寒食上塚陳此饌簋雖不足報其劬勞庶循乎世俗
之禮維吾親吾弟及其子念之

祭邵姨夫文

代孫垣作

嗚呼先人在時我姨丈以肺腑之親往來之頻不遠三舍有如比鄰至不幸歿於鄭校歸葬橫山而姨丈弔之祭之猶無異乎平昔禮意之懇懃也數年之間姨丈不祿吾兄則折桂秋風時垣又失脚危途路迷而車覆母嫠居子戎服母東吳子西蜀回視六親皆茫然置諸弗告今也幸服役而過家哀辭一幅酸淚一掬吐母子之真情於此來之一慟哭也尊無醇酎豆無旨蓄聲容藹然鑒此衷曲

新河口祖墳上祭奠祝文

維洪武十六年歲次癸亥二月初九日孝孫某敢昭告
於祖考妣伯父母祖父母父母從父母九位尊靈曰墓
祭本非禮欲子孫於雨露之春不忘厥祖從俗祭掃以
寓孝思尚冀遺澤使後人繼繼繩繩有永弗替謹以清
酌庶羞祇薦歲事謹告

謝莊曾祖墳上築塙祭奠祝文

維年月日孝曾孫某以目昏不能遠去躬拜墓下謹遣

玄孫某等代行敬昭告於曾祖考妣二位之靈曰人本
乎祖極恩如天祖世雖遠天不可忘睠茲故土殯宮猶
存繚以周垣以禦樵牧清明省掃歲修祀事尚祈垂裕
悠遠無斁謹告

寒食祭妻墓祝文

余生與細君偕老君年七十有九我齒長於君者兩年
以余之潦倒而君稍強健也孰謂君先棄余而逝也君
骨肉之寔於此脩焉兩旬視時艱虞恨不能相從泉下

以安其居維茲寒食攜子孫狗俗祭掃以寓哀思尚享

寒食祭子墓祝文

墓藏而骨豈祭所乎然而爾之遺言有曰歸祔先塋子孫
姻戚歲時灑麥飯於松楸之下志願足矣今茲寒食扶
我攜幼設祭墻間以踐爾之言如爾之素志抑亦表長
幼骨肉之情吾子有靈尚飲食之

代祭胡隱君文

惟靈世居東吳笠澤之濱厭處卑濕於茲卜隣同井為

鄉垂五十春維桑與梓寔為婚姻待人以恭儉以律身
二子克肖構獲惟勤貽謀諸孫佔畢其呻老福婆娑節
杖幅巾如某等同一里閭往來僉僉以翁高年而尊而
親翁雖不飲席必同茵笑語相狎翁弗我嗔春風童顏
喜色津津意其壽考錢鏐之倫何物二豎瘡我吉人我
來問安翁語諄諄別不旋踵哭聲遽聞追念疇昔涕泗
霑巾當此窀穸束芻具陳出門一慟悲風愁雲

張彥實哀詞

歲丁亥之仲冬丹陽張君彥實邁厲瘡疾不五日而逝
其友人謝應芳為哭之慟且歎曰噫君自小儻多知
謀尚氣節能仗大義平居論時事言如湧泉故縉紳多器
之其憂人之憂樂人之樂亦庶幾杜季良之流歟第峭
直不容人過遇強梗欲鉏去之用是或斂怨焉後至元
間邑大姓與令有隙且與君不相能因媒孽其短詣部
使愬之謂君嘗為令納賄部使者初不能察稍加淫刑
欲強服焉令恐噤不復辯君受挫辱至數日終不忍加

誣於令若是者非伏羲能之乎至正初里有橫逆君疾之一日乃自殘其幼構大獄以陷君之季子聞者股栗君處之裕然詣郡邑雪理卒能脫其子之械以械之他如姻舊及凡與之遊者顛則扶之危則持之若是者又不可一二數但惜乎負奇崛之氣時不見用終於此而已於乎吾彥實之死可不為之哀乎然而象賢有人君又能擇其最肖似者為仲氏之後使先世之業並立弗墜則彥實之死猶無死也奚哀為雖然哀者人情也禮

曰哭死而哀非為生者也予與君素相知而氣質且相
類狐兔之悲疇克自己故為之辭以寫其哀云

天胡為今生梗楠構大廈兮無不堪匠石不遇兮老雲
巖天胡為今生龍媒鹽車困兮駿骨埋名駒汗血兮凌
風埃折瑤華兮山之阿望美人兮不我過我心傷悲兮
淚滂沱

壽上人哀詞

浮屠壽道傳蘓人也年三十嬰暴疾不終夕而逝其親

戚師友以及鄉里之人也咸哀之予之哀則又有已私
焉吾聞道傳為兒童時既棄家學浮屠越數歲慕徑山
古鼎師化風往事之為入室弟子未幾師命典教藏聲
譽蔚然已而振錫遊諸方叅禪門老宿聞見日益廣操
履日益堅被緇艾茹蒿芹泊如也一日念親老無他侍
養飄然來歸朝夕奉滫瀡以荅顧復之恩又築室西林
閑門讀天竺書且旁通百氏會其歸趣閱五六年矻矻不
少暇庸詎知遽止於斯邪吁夫道傳之聰敏勤苦早歲

入徑山之室典教藏已卓犖不羣使歷階而升足為叢
林師表矣道傳乃退然自守而卒無聞也養親而不得
終其志力學而未能發乎文辭以黼黻斯道此衆人所
共惜而為哀者也予於道傳初無葭莩之親鄉里之暱
喪亂之際傾蓋如舊館焉以安其居穀焉以盡其禮愛
之敬之二載猶一日視親戚鄉里殆有過焉以今思之
可不重為之哀乎或謂彼佛以寂滅為樂而道傳深究
厥旨必樂於逝矣奚哀為予曰不然吾今哀道傳者情

也其樂與否非所論也夫情動於中而辭出焉辭而哀之亦以示不忘云

大鈞賦物兮物胡不侔深谷蘭摧兮猶生道周良農服田兮祈穀有秋禾方秀實兮賦以螟蛉於予哀哉伊人好修天其渺茫兮吾將誰尤

哀鶴辭

至正八年秋盜夜入吾友諸葛用中氏之家殺其鶴於後圃已而盜被執詰之盜吐其實當其穴墻之時鶴長

鳴警之既穴而入鶴奮翮而前若將力禦焉故遇害用
中於是惋惜流涕眾之席坎而埋之縣文學汪君以敬
為作瘞鶴銘進士王君伯恂又為之誄然則鶴之死可
無憾矣然余於是重有感焉夫物性能警盜者狗也非
鶴也警盜而鳴亦已異矣禦盜而死不亦義乎人為物
靈求其舍生取義者猶不易得況禽鳥乎葛之鶴其可
謂義鶴也已矣故哀之以辭其辭曰

鶴兮鶴兮瘞彼高岡爾鳥其形心人之良鶴之斃兮狗

於義兮骨朽名存猶無死兮



龜巢稿卷十五